



PLED SIN VIA

Duvrein nus ina midada dil clima en damondas dalla libertad religiosa?

LUCIA WICKI-RENSCH

Il 22 d'ost vegn seregurdau sin l'entir mund dallas unfrendas muort violenza ord motivs religios ni da cardientscha. Quest di internaziunal ei vegnius proclamaus per l'emprema gada ils 22 d'ost 2019 dall'UNO.

En in mund nua che differentas «fuormas d'ina tirannia moderna improvan da sbassar la libertad religiosa, senza dretg da vuschar, sin ina subcultura. Nua che la religion vegn surduvrada sco stgisa per odi e brutalitad eis ei necessari che aderents da diversas tradiziuns religiosas aulzan ensemen la vusch per la pasch, la toleranza, per la dignitad dil carstgaun, e pretendan respect per ils dretgs d'in e scadin.» Aschia di il papa Francestg!

Mo co eis ei vegniu tier quei di commemorativ, il qual tolescha buca pli la violenza ord motivs religios? Atras ina iniziativa dils

Stadis Uni, la quala ei beinspert era vegnida sustenida dad autras tiaras oravontut era da l'Uniun Europea. Quella alianza internaziunala per la libertad religiosa ha giu effect che en Danemarc, Hollanda, Stadis Unis da l'America, Norvegia, Finlanda, Pologna, en la Gronda Britannia ed en la Germania eis ei vegniu elegiu in ambassadur per la libertad religiosa. Deplorablamein en Svizra tochen oz aunc buca.

Malgrad tut quels sforzs laian l'euforia. Retschercas pretendan che dus tiarzas dalla populaziun mundiala vegn sin ina moda ni l'otra en contact cun la violaziun dils dretgs dalla libertad religiosa. Entgins schizun en fuorma da persecuziun. En connex cul cristianissem vegn numnau la cefra da 200 milliuns cristians che vegnan persequitai sil mund. Sche nus focusseim mo per exempel sin la China ed il

Myanmar, nua ch'er il pievel dils Rohingya ed ils Uigurs vivan, savein nus dir che 30 milliuns muslims vegnan era persequitai.

Ei quei per nus ina sorpresa? – Na propi buca, cheu setracta ei d'in svilup, il qual ei sederasaus dapi tschentaners cun ragischs che sebasan sin l'intoleranza, la discriminaziun e che sederasan tochen la persecuziun. Cun ina expertisa da 800 paginas analysescha l'organiziun «Baselgia en miseria» en siu rapport sur dalla libertad religiosa en detagl la situaziun da 196 tiaras. Quei ei per interessents ina lectura complexa.

Lucia Wicki-Rensch è naschida e creschida si a Trun. Ella s'engascha dapi plirs onns tar l'organiziun «Kirche in Not», in'ovra caritativa internaziunala per las baselgias en miseria e per ils cristians persequitads sin l'entir mund. En collavuraziun cun RTR publitgescha la FMR adina en la davosa ediziun da gasetta da l'emna il «Pled sin via». Quel è alura era d'udir mintgamai la dumengia tar RTR, en l'emissiun «Vita e cretta».